

Гиёхвандлик аср вабоси

Инсон ҳаётда яшар экан, яхшиликка интилиб, ёмонликдан қайтиб яшашга ҳаракат қиласи. Лекин “яхшилик” ва “ёмонлик” тушунчаларига ҳар ким ҳар хил таъриф беради. Ҳаёт эзгулик билан гўзал. Аммо баъзан эзгуликка ёвузлик кўланка солади. “Аср вабоси” номини олган гиёхвандлик инсоннинг осуда ҳаётига рахна солиб, онгини ўзига бўйсундирувчи заҳри қотилдир. Бу шундай куролки, ўз домига илинтирган одамни разолат дунёсига етаклайди ва бу жараёнда инсон жамиятдаги ўрнини йўқота бошлаганини англамай қолади.

Гиёхвандликка қарши курашишда маънавий соатларнинг аҳамияти бекиёс. Аҳоли ўртасида мазкур иллатдан огоҳ бўлиш, соғлом турмуш тарзини тарғиб этиш мақсадида учрашув ва семинарлар ўтказилиб, “захри қотил”нинг қандай аянчли оқибатларга олиб келиши кенг тушунтирилмоқда. Шундай тадбирлари бири Ўзбекистон автомобиль ва дарё транспорти агентлигига жорий йилнинг 23 октябрь куни “Гиёхвандлик аср вабоси” мавзуусида бўлиб ўтди. Унда, Тошкент шаҳрида фаолият олиб бораётган “Антинар” наркологик клиникаси шифокори Ҳилола Ҳабибуллаеванинг маърузаси тингланди.

- Гиёхвандлик кўчасига кириб қолиш кишиларда турли хилда кечади. Баъзилар тўқликка шўхлик қилса, бошқалар ўзи билмаган ҳолда алдовлар натижасида унинг қурбонига айланади. Ушбу иллатга ружу қўйганларнинг, айниқса, ёшларнинг бу ажал гирдобига тушиб қолишида кўпинча оиладаги муҳит ёки безътиборлик сабаб бўлади. Ёшларнинг бўш вақтини бекор ўтказиши, ота-оналарнинг фарзандини ҳаддан ташқари эркалатиши ва улар тарбиясига бепарволиги юқорида келтирилган салбий оқибатларга олиб келиши мумкин, дея ўз маърузасини бошлади Ҳилола Ҳабибуллаева.

- Фарзанднинг соғ-саломат дунёга келиши, униб-ўсиши, жамиятда ўз ўрнига эга бўлиши, энг аввало, оила бошлиқларига боғлиқ. Бу борада меҳрибон ота-оналар зиммасига катта масъулият юкланди. Демак, “Аср вабоси” деб аталувчи гиёхвандликнинг олдини олиш, унга қарши курашишга фақатгина ҳуқуқни муҳофаза қилувчи органлар эмас, жамиятдаги ҳар бир инсон масъул. Мақсад эса, дунёни гиёхвандлик балосидан сақлаш, инсоният саломатлигини асрашдир.

Гиёхвандлик - инсон маънавиятига зид бўлган, унинг ижтимоий-руҳий ҳолатини буткул издан чиқарадиган ғоят хатарли иллат, бедаво хасталик. Мутахассисларнинг фикрига кўра ўртача йигирма беш йил умр кўришлиги, гиёхванд фақатгина ўз соғлигини йўқотмай, балки ўз ҳатти-ҳаракатларини ҳам назорат қила олмаслиги, у нафақат бир шахсни, балки бутун бир халқни, миллатни йўқ қилиб юборишга қодирлиги ва гиёхвандлар асосан 16 ёшдан 35 ёшгacha бўлиб аксарияти ўзига тўқ оилалардан бўлиб, гиёхвандлик ижтимоий хавфга ҳам эга эканлиги маърузачи томонидан айтиб ўтилди.

Тадбир давомида маърузачи ўз сўзида гиёхвандликнинг келиб чиқиши, соғлиқни сақлаш тизимида гиёхвандлик иллатига қарши қилинаётган ишлар

юзасидан Агентлик ходимларига маълумот бериб ўтди, ўз сўзининг давомида - гиёхвандлик, тамаки ва алкоголь моддаларининг гирдобига тушган ёшларнинг организмидаги салбий ўзгаришлар, наслга, соғлиққа, онг ва тафаккурига таъсирини аниқ мисоллар асосида гапириб берди.

Маъруза мавзу юзасидан савол-жавоб ва қизғин мунозараларга уланиб, ийғилганлар жуда зарур ижтимоий-хуқуқий билимларга эга бўлдилар.

Тадбирда Агентлик Марказий аппарати, АТРНТТ Республика маркази, Автодарётранс-Илм давлат илмий-методик маркази, Агентликнинг Тошкент шаҳри ва вилояти ҳудудий бўлимлари ходимлари иштирок этишди.

Ўзбекистон автомобиль ва дарё транспорти агентлиги Ахборот хизмати